

摘藻堂四庫全書薈要

集部

欽定四庫全書薈要卷一萬五千一百六十四

集部

山谷別集卷十三

宋 黃庭堅 撰

書簡

謝張宣徽書

答李材書

答從聖書

與邢和叔書二

與通判通直書二

答幕府書二

回張益老求琴銘書

與張道濟帖二

與胡逸老書十

與劉晦叔書二

與李端叔書三

答俞卞洪範帖

答黎暹晦叔書

與呂晉父帖三

與鄭彥能帖

與松老書

與王及之賢良帖

與郭明叔提舉書

與元陟贊府書三

與李承之主簿書二

與李少文書

與趙都監帖二

與分寧蕭宰書五

答王子厚書四

書簡

謝張宣徽書

某頓首再拜致政宣徽少師閣下某不肖懼不給使令
豈敢望教伏蒙開納衣被以道至極溫厚瞻拜孔德之
容慰適小人之願幸甚蒙慰誨勞苦非晚學孤生之所

宜蒙惟閔盛德之聲色於不有倚富貴於几杖之外而下無能此豈流俗之情哉顧氣淺能薄夙夜自強不息以副門下之意暑氣煩溽不敢再造齋館伏祈調御衛生之經河潤九里不但小人蒙福也謹上狀惶恐皇恐

答李材書

某頓首啟頃辱惠書勤懇閒居多病人事廢絕遇風日晴暖從門生兒姪扶杖逍遙林麓水泉之間忽不知日月之成歲以是久不報書專人來又蒙牋記累紙存問

益勤伏承偃息田里侍奉吉慶鄉鄰父兄雞酒日至何
慰如之今歲黔中霜雪早寒數日來雪欲及摩圍之麓
不肖到黔中三年所未有也不審南究冬候何如此方
舊同僚惟呂東玉在亦逼代矣守倅見不數然意乃鄭
重皆清慎不擾不易得也某杜門終歲益覺清淨時苦
門生抱經來咨問尚俗氣未除耳範公去已十月不得
音問比聞為凌雲疏請或被逼徃徃復來此也竄逐之
餘枯木寒灰未委溝壑無階會集惟有馳情千萬進學

畜德以須陞用使二親身見之

答從聖書

某再拜比蒙賜教勤懇審治郡威嚴內外斬斬齋閣安
閒頗與僚佐尊酒謝江山之勝何慰如之某自放林壑
之間閒居益有味弟姪到眼前遠者常得安問頗以自
愜恨數舍無緣參候爾於不肖有所聞教之篤之乃所
望於左右謹勒手狀

右皆
家傳

與邢和叔書二

某頓首至親中失公擇莘老二德人哀念不可忘頃來
意緒嘗憤憤飢飽或不省識也方今人物眇然而朝廷
屢失長者可勝歎耶今年來百事慵懶唯思江湖深渺
可以藏拙養愚但事勢有未得者耳公相知察故及此

又

伯氏梁縣頗安職每得安問也令嗣安勝詩人得在江
山勝處沉疴當脫然去體有新詩數見寄為佳因來乞
韋蘇州集得差厚紙印之幸甚燭下眼澁十字九乖幸

照察

右家藏
真蹟

與通判通直書二

某啟雅聞豪士之風恨未接欵曲今者放逐顛沛不意
乃有參對之幸寒暄未節不審即日尊候何如伏惟監
理鎮靜蠻夏肅然宴居閒安百福所集某行李中有貴
州鹽鋪兵十餘及建始借白直數人勢須以煩使部不
審可得否到城參候更當咨稟

某竄逐孤危之迹情實可知邂逅長者監郡幸獲參展

承高明特達以場屋一日之分顧盼存恤恩意甚備使
旅况無瑣瑣之態感服之情未易言也寒暄不常不審
尊候何如伏惟監理豫暇時能樽酒以對江山代者未
有車音否某蒙資致行李之力已及貶所人事方匆匆
奉狀不能萬一願珍護眠食以須寵祿

答幕府書二

某竄逐窮鄉惟恐蒼蔚之不深不復與人事乃辱賜教
累幅存問勤懇敘示先君疇昔舉送之舊豈勝感念即

日霜寒不審尊候何如幕府省文書當有樽俎之樂未
緣會集千萬珍重

某頓首方欲遣記問秦瑜所附書信忽奉來誨喜承即
日霜寒王事不至勞勤體力輕安寄惠家庖所作醬極
濟所乏仍承誨諭奉煩鄙事已措置有緒感刻感刻所
示連蹇仕途實深歎息當路諸公頗求真材實廉之意
計不相遺但棄捐漂沒不能致人輕重亦不能率爾作
書達人惟因行李相見或及人物乃敢開道之耳此意

公所了了也然成就自有時馬鳴而馬應之非智也旦夕遣回黃甘者別上狀千萬珍重

回張益老求琴銘書

某頓首再拜少同里閭又接懿親科場中略同緒言而從食南北缺然音問不通者十有餘年矣忽奉來教猶荷存問慰此瞻思承諭游意於塵埃之外得妙手於子磬之斧斤又辱推許以學古之意欲徧為諸琴品藻誠願附名於不朽然法不孤起仗景方生此公之所聞也

要須俟他日得一披拂乃可下筆人還匆匆上狀

與張道濟帖二

某頓首穀旦辱惠顧適有他客不能延欸甚愧天氣和
暖伏想體力勝健龍尾研自作墨各一宣筆四漫助文
房之用輕浼輕浼來早令三子就學惟煩訓勵之以嚴
久之乃不費力古者易子而教之蓋欲用威也

今日幸陰涼諸生事業皆辦謾攜琴至草堂亦佳亦息
焉游焉之義也

與胡逸老書十

某叩頭頃辱報書甚勤懇來人不取答遂行目前多故
因循至今秋氣差冷不審體力何似雅聞公有山水清
尚獨能尋寂寞文字之樂徒恨憂居日從事於窻窻未
能奉欸語以觀所聞惟有馳情伏冀強學自重謹勒參
候

某伏奉手誨審宴居不爽衛生之理體力勝健良慰懷
想今歲秋暑常多病老態百出殊覺不甚耐也廣夏虛

堂想不知蓬華煩溲之味比來何似終日頗復撥棄俗
緣近書冊否東坡集偶有兩部輒分其一助藏書承許
中秋後見過拂榻鋤逕奉遲足音也

某頃辱車馬來助給事叔父葬事事緒叢脞不能款曲
淹留賢者於今以為愧霜寒天氣清明伏想日用安和
比何以為樂頗得新書畫否所留卷軸偶夜宿山堂松
風泉溜擊觸筆意揮寫略徧今遣上二短軸欲寫鄙詩
草盡在怡憇閣夜中不能取可候他日也此絹軸用礬

粘極中節頗令人喜書如所背高軸幸惠一軸欲寫一
文字與羅漢南老早得來免沒納短卷耳晨起手倦奉
狀草率不宣

所問田宗印蓋出史記齊世家子行曰需事之賊也誰
非田宗所不殺子者有如田宗又曰子我盟諸田於陳
宗陳宗猶田宗也胡氏出於舜後胡公滿有陳國者也
用田宗字印義亦叶矣戲虎屏漫作贊如此不知可否
某頓首惠及劉氏樂府亦好書頗助寡聞也建蓋政須

比還雲巖爾法帖已領老杜詩且留不妨舊日所聞虛
淺比來讀之多解其趣然常以嬾倦不能隨手抄記若
他日得暇當以蘇州本隨處誌記也前欲作黃庭草因
查田呂三十六有一軸絹在案上因一夜草得黃庭殊
有意思近為王良翰攜去恨公不一見也良翰又為摹
得韓幹二十餘馬及閻立本十二國圖皆比佳物何時
復能強行來一觀耶公來但同益老諸人喫飯葷素皆
無所費不必以為嫌也

某頓首前辱車馬甚勤而賓客冷落饌具單薄政以不
欲作俗禮使賓不暖席耳雖然得君子淹留意亦不甚
滿重煩稱謝何愧如之癰方潰臂作勞輒痛極草草

某頓首僕夫回辱手誨審宴居體力勝健良慰懷想元
明十四日遂行但恐公未即來然已拂榻奉候矣所喻
寫周興嗣千字於公何所不可然常嫌千字太鄙俚若
欲刻石用高尺許卷軸草黃庭亦可耳草書大字古無
此法近世唯張長史僧懷素時時作數字耳其餘皆俗

書也公好書如嗜欲要須蟬蛻塵埃之間玩思高古乃可以垂世傳後耳方治元明行橐奉狀草草

某頓首寒燠不節比來體力何似益老得從容齋館想少慰大草殊非古古人但作小草爾故有意學草當學草小字今法帖中有張芝書狀二十許行索靖急就草數行清絕瘦勁雖王家父子當斂手者也公必欲求善工刻字當奉為書小草黃庭須得意輒作數行耳今日欲學草書當求智永千字文五百許字其半王著足成

者此小草迺無俗氣爾餘不足學也

某頓首比辱車馬肯淹留良以為慰共飯蓬藿之間藜
藿滿筋又以為愧早來衝冒風寒體力佳否承手誨勤
懇感慰所須諸字若得暇一日之功或無思則數月要
須獲麟於未發前耳天氣昏濁亦增老倦奉答草草

某頓首承遂歸心於禪悅何慰如之可試看楞嚴圓覺
經反觀自己是何道理既為大丈夫須有大丈夫事有

麼有麼

右皆
家傳

與劉晦叔書二

某頓首再拜晦叔發運吏部九兄閣下黃州一面而別
情深耿耿鄂渚漢陽乃得相從甚慰十年之意行日馳
至江滸承已涉大江但望風馳情耳江夏送到所惠教
并得紫萼糟薑敬佩不忘之意別來未承近問懷仰曷
已謹附承動靜願加珍嗇謹勒手狀

黃州幸得一面謂可追舟尾得款語至武昌承大旆已
解豈勝悵仰霜冷不審尊候何如過湖不驚恐否子舍

想皆勝健學問皆有日新之功潭府從來號為少事兄
老於世故文法當迎刃理解但以詩酒謝江山耳某至
鄂州遂僦屋寓舍諸亦粗遣去雙井才七程耳方阻瞻
承臨書耿耿謹勒手狀伏祈為國自重

右得之其孫伯
虎家藏真蹟

與李端叔書三

別來兩辱書荷恩卹終始不渝方其與魑魅為羣竊伏
草間不忘歎息所以不作書者往時奉九書而不報公
猶不愠在棄捐中宜相貸也奉十二月二十四日手誨

不怒而加勤乃知德人之度久而愈深也又知不卹乖
迕在官事事此雅所期左右者更願守心如珠守口如
餅爾某多病早衰百事不堪向蒙恩遂便郡之請冬後
乃差健遂不敢再請宮祠三兩日暫到雙井二月末後
復至荊州乃趨太平前此計尚得修問

得書數幅想見傲睨之容承官暇每從蘇黃門引領欽
歎何時預此清集不肖鬚鬢已白十八九短髮幾不可
會聚求田問舍頗有之亦未如意耳小兒娶婦尚未得

孫女子今已三生矣知命二男三女似有可望者三女
一已嫁其仲亦咄咄逼人矣元明在萍鄉甚安亦有吏
能聲後作虔州獄官監司亦知渠恪而解事然非在黔
戎時語也老來嬾作文但傳得東坡及少游嶺外文時
一微吟清風颯然顧同味者難得耳

數日來驟暖瑞香水仙紅梅盛開明窻淨室花氣撩人
似少年時都下夢也但多病之餘嬾作詩耳公比來亦
游戲翰墨間耶或傳陳履常病且死豈有是乎比得荆

州一詩人高荷極有筆力使之陵厲中州恐不減晁張
但公不識耳方叔安否

答俞卞洪範帖

所論上黨風俗可病何時不然八風與四威儀動靜未
嘗相離也雖古之元聖大智有能立於八風之外者乎
欲斷此事當付之党彥進党在許昌有說話客請見問
說何事曰說韓信即杖之左右問其故党曰對我說韓
信對韓信亦說我矣即公不聞洗耳而已

答黎進晦叔書

精一之說筆下未能盡試熟思之日用應世務者是精是麤為一為二便可得之若要作記俟他日從容適有少人事窘迫又作南方數處書故未暇耳

與呂晉父帖三

別後忽復春夏哀苦窮窘多病嬰纏日力不自給久失修問即日初暑不審何如伏惟平易之政民有畏罪懷仁之心訟庭寂然縣齋燕處有以自娛聞代者已在湖

口解印想必有期遂有相遠之歎臨書增懷

比辱車騎臨顧恩意良厚適到家日苦賓客肴具菲薄
不足淹留君子於今愧悚比方掃除巖下草堂日親耒
灌林影水聲可以永日恨公不能來爾雙井四瓶皆今
年極嫩者又玉沙芽一斤以調護白芽然此品自佳氣
味但未得過梅香色味皆全爾公著意茲想不可欺也
冬暖而雨天氣未佳不審比來何似伏奉牋記累幅
禮數過當雖懷戢勤重然甚悚仄不敢承也比以舟楫

未治淹留意緒殊不佳遠承津遣開濟行李非仁哀孤
苦安能如是欽服高誼大不可言不肖於公家伯仲有
一日之雅又德占家復聯瓜葛徒以未嘗得望履舄故
不能一通記問今者遭罹大故護喪葬田舍道出貴部
茆然凶麓無緣參候伏惟豈弟之政田里所安縣齋虛
閒寢饋宜適哀苦癯瘠雪寒手凍上狀不如禮伏幸痛
察

與鄭彥能帖

病中聞苦下痢甚憂甚憂昨日見顏色知向安矣但少服攻擊之劑調飲食之味日向痊矣赤石脂末二錢加白麩二兩半切三刀子軟煮調和羊清汁食之胡給事云虛勞人不過兩服即成臧府矣河魚丸用大芎二兩神麩二兩炒為末湯浸蒸餅為丸梧桐子大每服二十丸薑湯下桃紅丸赤石脂二兩細研炮裂乾薑末二錢和勻湯浸蒸餅丸如梧桐子大每服百粒濃粥飲下日三服可也

與崧老書

某再拜奉別忽復八年雖於親舊間時聞動靜而奔走
南北無緣作記以修嚮往唯攀仰不忘爾昨兄弟往來
貴部皆蒙勞來甚勤久欲通書道謝而冥頑困於簿領
匆匆至今即日不審何如伏惟邑里安於豈弟犴獄肅
清齋閣時有文酒之樂某竊食於此無以庇民襍被待
菟除耳未緣參對惟冀自重以須百祿謹奉狀

與王及之賢良帖

某頓首前辱車騎屈臨匆匆未能參候重承書詞稱述如後進見先進之禮不肖自視歎然實不敢當但愧恐耳高文三編蒙不以交淺傾困賜之恩意甚厚爛然盈目未能得其味但欽仰爾繡川集計多有本輒乞取藏之春秋論策借留熟觀對客上答不如禮

右家傳

與郭明叔提舉書

某再拜頃者使節入城數屈車騎不肖屢造館舍終不得面如相避然爾後日欲通音記屬親老比來多小不

快人事書尺十常九廢也伏蒙賜教不忘感激感激長
者淹留在外豈獨故人所歎克勤小物以道為準以聽
浮雲之去來鼓鐘于宮聲聞于外夫忠信孝友之實孰
能揜之

右見
石刻

與元陟贊府書三

某頓首頃者與園明欵曲極道足下詞學之美潮音來
詳悉動靜殊恨未相識也專人辱書勤懇審王事不至
勞勤左右經史何慰如之某蒙恩東歸方爾睽遠臨書

懷仰千萬珍重十二月十三日

彭山風物亦佳否子思在永豐數得相見否其文章學問意氣骨肉皆當即在臺閣此青雲之士可以附千里者也仕宦嘗患無師友如此士在旁近殊不易得也

園明塔銘出於迫猝不能盡其美質顧其大槩不愆其平生所存耳祭文中具之者銘中更不複出也當路諸公亦有相知能為引重者乎

右見石刻

與李承之主簿書二

某頓首自荊州來省伯氏於仁里聞足下鄉鄙之譽甚
美恨未相識也乃辱專使惠書至意傾寫不見鄙外幸
甚幸甚告以從來問學之意知足下不汨於流俗求配
於古人士之不自重久矣觀足下所見教者能充其言
豈易得也至於推與不肖在先達君子之列則不敢當
見彈而求鶚炙似足下之過也夏氣暄濁比來日用何
如聞醴陵巖邑民頗囂訟佐邑想亦少暇日同僚為誰
臭味相投否一舍相望無階修敬謹奉手狀

某頓首惠賜新作一編撥忙三四讀之務當求是論議有餘佳作也與足下無一日之雅而辱不愛珠玉傾困倒廩以畀之知足下好學絕人遠甚矣士嘗苦貧故從仕之日早又不得明師畏友琢磨成就之故暖姝以自得為足而不免於宋榮子之笑也觀足下學問之氣不倦也故相為言之耳舍弟仲堪尉衡山輒有一書幸指揮寓遞達之

與李少文書

某辱書勤重知六縣君及諸妹安勝為慰四哥往親迎
必每得安書也吾姪性資開爽他日必不居人後惟強
學自重讀論語孟子取其切於人事者求諸已躬改過
遷善勿令小過在已則善矣適得報當除名竄宜州故
急作書遣此僕還極草草千萬自珍自愛

與趙都監帖二

示諭糞除四衢甚蠲潔料才者必爾漫及之爾想比來
亦嚴火禁處處瀦水以應星變示修人事敬畏之意前

欲作界方亦不必枕榔但得檇木之類亦可有木工所用枕榔曲尺求一枚此裁紙之佳器也

伏暑稍易堪夜中清冷美睡想殊得所但當深思寶護玉體立功名爾所寄尺六觀音紙欲書樂府似大不韻如此樂府卷子須鎮殿將軍與大夫娘對引角盆高揭萬年歡乃相當也一噓漫書一卷大字去耒陽茶磴窮日可得二兩許未能足得瓶子且寄兩小囊可碾羅畢更熟碾數百點自浮花泛乳可喜也須佳紙當奉寄宜

州紙只是包裹材器耳彼易得藿香草豆蔻否所須通
俗樂府得暇當用小牋作一卷子去

右皆
家傳

與分寧蕭宰書五

某再拜前日得以挹子瞻拜下風所得過於所聞實自
開慰時往來屈旌旆賓餞實自不皇春氣暄暖不審尊
候何如細民不能不辨爭伏惟刃迎縷解終日無事欲
作城中二三書輒煩借一小吏能寫牋啟者一日即遣
回矣鄙事溷高明悚惕

伏想政成民信邑廷事益清簡時有文酒之樂以謝江山清公棄黃龍而去事勢當爾盖妙道非悠悠者所知而病廢之聲已滿江西黃龍甘餌欲者甚衆耳新公復還雲巖道衆當雍雍肅肅亦助道化不淺也非高明忠信不能成此法緣欽歎欽歎雙井弟姪雖每丁寧不知能不以事溷庭下否每深悚惕也張損郭西水磴聞得願旨減柴薪之害感悚感悚

自頃聞盛德之聲而願見既獲承緒餘淹觀風度更得

懷仁抱義之實恨參對之晚也薄於事役草草上道又
承營從渡江將之顧鄙薄何以承此勤重實深悚惕至
龍潭遇大雨遂宿法昌山未能作牋記乃奉手誨存問
恩意甚厚感激感激雨意未解不審尊候何如謹奉手
狀

今旦重屈軒蓋未獲造館下悚惕悚惕即辰伏惟起居
萬福茶一缶才可飲五七客乃今年雙井蒸芽第一其
為物薄可比沼沚之毛蘊藻之菜當不以邑子有獻為

嫌也

昨承再請新公住雲巖復留清公西堂坐夏此二公衲
僧之命脉今江湖淮浙莫居二禪之右者公開此法緣
所謂不煩繩削而自合者也現前無量皆宗於此徹底
唯空雖復徹底唯空大用繁興無不重規疊矩此是本
有不從人得惟待心華發明又須得明眼人為證所謂
不得春風花不開者也不審頗延二道人鑽研此事否
古人所謂唯此一事實其餘可不學而能之也兜率照

公誠如所諭形固可使如槁木心固可使如死灰者也

右見
真蹟

答王子厚書四

某再拜前辱書勤懇衰病老嬾久不修問惟是懷仰何
日不勤閨餘涉冬天氣小冷比來日用何如亦得世外
蕭灑人與之發明此道否古之人不從流俗之波自放
於深山窮谷非為山川之美與不交世事無憂患而已
蓋欲深明已事闕百聖而不愧質鬼神而無疑故於彼

有所不願耳承山齋頗有書籍時亦挹其義味耶石恪
畫妙絕亦不敢取但欲徧觀公家所藏耳須至樂豹隱
二榜匆匆書不能工謾往石洞忽告行奉書草草千萬
珍重

辱書勤懇審秋來益得意於江山日用清勝何慰如之
寄惠峨眉笋及梅棗等荷不倦之意然笋以密封皆敗
可惜也借示石恪畫一軸此天下妙筆也熟觀之動人
神爽也宋純時果染色極似趙昌枝葉乃似過之王友

功夫雖到脫灑處蓋不及也然花木之類直得真趙昌亦不必收本來格不高耳不審有孫大古佛像鬼神及湖灘鷺鷥輩否有之俱欲借觀也所寄歐陽文忠雙井詩詞意未當雙井之價或恐非文忠所作今分上去年雙井可精洗石磴曬乾頻轉少下茶白如飛羅麪乃善煮湯烹試之然後知此詩未稱雙井風味耳未卜面會惟希珍重謹勒手狀

所寄卷軸老人下筆不喜循界道卷終又寫不盡輒以

一紙續之但如此亦自不凡耳二頌語拙意陋謾枉仰
高之意雙井法當以蘆布作巾裹厚埴盞一隻置茶其
中每用手頓之盡篩去白毛并簡去茶子乃磴之則茶
色味皆勝也點時淨濯瓶注甘冷泉熟火煮盤煖盞令
熱湯才沸即點草茶劣不比建溪須用熟沸湯也往嘗
作建溪茶曲不審見之否或未見後當寄也

伏承易名以避處冲甚善然寬字亦未甚好輒欲易貴
名為朴可否既與子厚字合又王朴周世宗朝名相其

心術治行超然出一時人中心常竊慕之也


右皆
家傳

山谷別集卷十三

謹案卷十二第十六頁後八行恨未適耳刊本適

訛遵據別本改





總校官庶吉士 臣張能照

校對官中書 臣張九譚

謄錄舉人 臣胡念祖

欽定四庫全書薈要

集部

山谷別集卷十四

五

詳校官助教臣謝登雋



欽定四庫全書薈要卷一萬五千一百六十五

集部

山谷別集卷十四

宋 黃庭堅 撰

書簡

與劉溫如書

答陳敏善書

與孫惇夫帖

與輔聖書

與宜春朱和叔書二

與中玉知縣書三

答王秀才書

與唐彥道書二



與柳毅升書

與范宏父書五

與賈六宅書

與廖方叔帖

與李獻父知府書二

與俞清老書三

與幾道書

與彥脩知府書五

與崇寧平老書

與子仁帖

與公蘊知縣書二

與味道明府書二

與子正使君書

與元仲使君書

與宋仙民書

與六祖範老書二

書簡

與劉溫如書

某再拜頃者道出荆渚獲聞日新之論殊慰久別懷仰之心抱被接宿辱知辱愛恩同兄弟副所短闕無所顧惜感刻之情未易一一言也別來不能嗣音想道室宴安不忘鑒寐即日不審體力何如漸得道友否此公雖

多機智然探討此道極有根蒂觀諸人錯用心者多也
歐陽元老才器不在人後然學此道最忌半青半黃極
須淹浸得透始得與公相從更須發藥雪峯靈雲平生
參學不自肯所謂疑深所以不落階級昨日過峽州適
值斷臂道者相候不得却歸山中殊恨不與斷却那一
臂也無緣一笑故遠寄此千萬珍重

答陳敏善書

陳君足下因江季共辱書勤懇然牋敬逾禮見處以丈

人行則不敢當往在場屋與喬卿同年相近故相視為兄弟實以丈人拜先大夫也又書辭所推與太過亦非所敢當古人有言天下有名丘五其二在河南其三在河北涉乎陳衛淮晉之郊所見碌碌諸丘便謂足以當之恐不免為大方之家所笑耳雖然與足下草木臭味相近也故不得不相語越雞之不能為鶡材不足故也若不肖之材又安能及此豹藏於南山之霧而文章為國器者不可掩故也若足下之文何患不赫赫於世也

所惠別卷詩詞清麗讀之使人疊疊足下年少方日新而未已他日不肖方當望奔軼絕塵而歎耳河出崑崙墟雖其本源高遠矣然渠并千七百然後能經營中國而達於四海願足下思四海之士以為友增益其所不能毋務速化而已暑雨方作淮南已卑濕不審比來何如伏惟侍奉萬福季共來越報書忽忽才能作此記

與孫惇夫帖

某頓首雖叅對日淺竊以深識英氣了一郡事游刃有

餘欽服無以為喻報行李促迫不得盡款高論耳晚刻
伏想起居輕安北巖之約已具短牋道之矣來日若雨
作尚可一詣別若晴曉解舟矣千萬珍嗇以須遠用

與輔聖書

某頓首廬陝之行忽復四年雖書問不通時得動靜訪
聞於南方交舊間耳人來伏奉嚴教勤懇感慰無量仕
宦不遠鄉里定省之樂不廢親側又得文字為職何慰
如之往者行以道途淹留不及永樂之事天於公至厚

矣想能夙夜文事以銷往者好武之心此固是吾人至幸學官既無吏責頗得一意於文字想有論著永遠寄以性嬾惰睽違者幸甚某碌碌中秘書幸得窺金匱石室亦歲來老嬾無復日新又衆口食貧思得一江湖差遣使老幼温飽耳

與宜春朱和叔書二

承頗留意於學書脩身治經之餘誠勝他習然敦厚勸戒以防患洗心平生未嘗得侍而情如骨肉他日深念

之何以得此於左右豈君子於人望其表而識其裏真
以為可教耶竊佩服苦口之規於今不忘日者又蒙賜
教牋敬累幅且名以師保內訟缺然尤不敢當多病昏
塞眼前記一忘十以是不通書於几下又閱歲矣伏惟
君子盡人之情知四罪之地無嫚人之嫌謹附承動靜
且謝不敏謹狀四月日謫授涪州別駕黃某狀上

某頓首荊州士大夫之淵藪想多得佳士與游諸令弟
講學有日新之功邊鄙肅清外臺宴安伏惟簿領不至

勞動揚清激濁於使者日有裨益某待罪於此謝病杜門粗營數口衣食使不至寒飢買地畦菜已為黔中老農耳間居不欲數與公家相關故不復借書吏作牋記但以手書上答不審能照察此情否悚仄悚仄衰老多病亦不能固封惟痛察

與中玉知縣書三

某再拜往歲得款語於荊州雖無一日之雅而過蒙愛之忘其醜遽賜重言自顧缺然何以得此唯君子以虛

受故傾倒耳上峽來忽復五年不忘懷仰楊君來重承
教書勤懇遠寄衣物欽佩嘉德無有厭斁未緣承教臨
書惘然千萬為民自重十二月二十七日

某僦居城南雖小屋而完潔舍後亦有三二畝閒地種
菜植果亦有飯後逍遙之地所謂園日涉而成趣門雖
設而常闕者也生事雖闕竟未能有根本然衣食隨
緣薄厚亦自寡過少累耳但以舍弟知命不能樂靜居
數出入然流濕就燥水火自有性雖聖人不能易亦命

也恐欲知故具之承巴縣已是見闕聞已治裝計歲裏必到官相去數舍舟行可勤書也

令兄君玉想里居宴豫生事更崇成矣文玉黔陽計到任久官况何如邦玉湖南其勢當易得薦章也諸郎頗得學否伯氏已解越州今在揚州嫁一女乃入都謀湖南一縣也鴻範數相見經略令掬重以稱創鉅痛深之情衣冠小不如禮猶可惟情文當極乎哀也曾申問於曾子曰哭父母有常聲乎曾子曰嬰兒中道失其母焉

亦何常聲之有禮曰女子哭泣悲哀擊胸傷心男子稽顙觸地無容哀之至也公既從仕宜為鄉黨法則衣服言語飲食皆當極哀戚之情使後人有觀焉實不肖之願也滕文公尚能之豈君任不能

答王秀才書

某頓首承車馬東來將父命以厚遂客實欲高義之歡眉宇有學問之氣恨不能留從容以致琢磨之功然足以占君家父兄之賢也專人辱書禮甚勤某無所可用

於此捐棄漂沒豈所敢推以足下家風好賢樂善則可
矣惠菊窮憂其瘴癘感佩愛念之意欲分雙井以報嘉
德適發數十書遣遠來莊僕未暇及候他便也王定國
尚未到計是益州幹事淹留耳足下氣宇甚裕竊揣量
之但從師取友之功少讀書未及根本耳深根固蒂然
後枝葉茂導源去塞然後川流長浮屠書云無有一善
從嬾惰懈怠中得無有一法從驕慢自恣中得此佳語
也願少垂意不加功而談命猶不鑿井而俟泉也此乃

齊智之所知既承傾倒見與故聊助聰明之萬一

與唐彥道書二

某罪逆餘生苟活不死湮伏田里曠絕人事初不知長
者近在隣州不獲修記承問忽辱墜教恩意勤懇承宴
居仁里將十年眉壽康彊知止之風有激貪懦老成之
化功在後進曷勝欽歎即日天氣暄暝伏惟體力輕安
水濱林下不資扶持數舍相望無緣承教臨書增情謹
奉手狀候起居伏冀若時自壽以福遠親

某頓首放逐之迹人所賤鄙道出荊州就親舊少留湯沐乃辱長者敦婦家瓜葛之義顧盼甚勤贖行祖送恩意不倦中心藏之不可弭忘到黔中來得破寺墻地自經營築室以居歲餘拮据乃蔽風雨又稍葺數口飽煖之資買地畦菜二年始息肩以是至今不以書達齋几惟君子隱居就閒亦簡人事足以照察此心矣某既苦脚氣不便拜趨因杜門已數月雖鬚白面皺尚能齋粥如曩時惟懷仰風味則勤爾因人附承動靜

與柳毅升書

某頓首潛伏林泉之下老嬾日甚一日又杜門不接人
事所以久不能通書惟長者於某兄弟至厚當能相忘
春氣暄暎即日起居何如伏惟萬福承已外除尚未報
美授何也黔州風俗誇陋士人絕不知學每思荊州多
士大夫大是樂國耳承天金鑿時有朋游會集否天民
兩遣人到黔州自雙井但不知道出荆渚長者猶在里
中耳江山悠遠臨書增情千萬自重以須陞擢附承動

靜

與范宏父書五

某再拜昨旆旌在城東以親老醫藥未閒不得至館下
尚欲再遣騎承動靜而使人即已行公私匆匆因循至
今天氣比來寒暄不常不審南土何如伏惟按部所止
官吏效實鰥寡得告神明之所聽起居百福尚阻參承
臨紙增情謹奉狀願為國自重以須召節

某叩頭伏承下車將閱月惟君子之政樂易使鰥寡皆

得職於窮山田畝之間伏想嚚訟之聲不至於庭下齋
閣閒虛起居萬福鄙州江山尚粗足為東南之勝使者
皆中朝名士想復得登臨之助無緣承諸緒言惟有馳
情

孤苦病羸蕭然在衰削之中方勤窀穸之役人事幾欲
廢絕且復多故多病欲以書疏通記室者一日臨紙屢
廢稽緩至此非高明孰能察其哀疚之情

春雪苦寒不審尊候何如伏惟忠厚之氣內外受福小

人之桑梓實霑餘潤惟是望風懷想之日久未能承教
但馳情耳

私家窻窻之事義當自竭力雖委屬應副有朝旨然百
事裁損不敢以溷州縣實恐以私故病公家耳然差移
兵士亦煩使府多矣熟念誠不自安

與賈六宅書

某頓首承家希有北園在崆峒山下想見氣象雄壯花
木成陰也寄惠端叔詩軸甚慰流落之情謾追韻和成

衰疾之餘殊無意味都不成詩也旅瑣不能作公銜奉
報惟君子能盡人之情故敢簡之耳貳車賢明想時有
樽俎以謝江山亦足樂耳往在黔中三年見府中極無
公事計今尚如此如以才者處之於事修明更勝往時
也恨無階一樽對摩圍林表耳事冗又賓客紛紛竟和
韻不成遂別作一篇也

與廖方叔帖

某頓首雖於左右無一日之雅而相與臭味不遠每喜

得聞清談甚慰向往伏奉教惠貺剗羊釀酒而將之以
公銜何其相鄙外而見待以俗禮耶非不肖所望於君
子也不敢以公銜效尤謹具狀道謝繼自今往來願去
俗禮如送遞書公狀不敢當願深悉深悉

右皆
家傳

與李獻父知府書二

某再拜伏承使節當還朝計且參臺省之論以慰遠近
之望如役法剩錢不得過一分法意甚美使議法者每
及此何患不皆為良法耶聞希達當以六月交印不肖

比候宣城迂吏往往得附舟尾江上從容耳許借船至
海昏稍令賤累免煩喝實受賜不淺若自炭步溝來三
日可至海昏也適以兩日傷暑頭眩上狀不如禮悚仄
悚仄

前承寄紙須作草漫寫呈不足觀天慶觀記竊欲自作
一銘大書付吉州刻之何如徧觀古碑刻無有用草書
者自於體制不相當如子瞻以峭遍填歸去來終不同
律也或此道士欲刻草書即欲草一卷黃庭令刻之何

如餘更當面稟耳

右得之獻父四世
孫如晦家藏真蹟

與俞清老書三

某頓首辱書審宴居有以自樂開軒陳書想見柴桑道人甚慰懷仰寄惠荆公自錄詩極荷勤篤不忘景陶軒名未為佳詩云高山仰止景行行止景明也高山則仰之明行則行之耳魏晉間人所謂景莊景儉等從一人差誤遂相承繆耳亦如所謂郡守為一麾也輒為公題為今是軒并寫去某自去年三月已不作詩徐為公作

數語并寫淵明詩十數首可作橙張之軒中也秀老歸
未為致千萬意

某頓首得手教承行李到維陽安穩甚慰俗間酒中亦
得磊落人知此道者否不肖沈埋於塵土中已成流俗
人時時夢想猶有曩時江湖雲月耳思欲弄舟風煙之
外嬰縛似未有脫期永懷方外之人自是宿債輕不可
更作蠶以自纏也阻面千里加愛謹奉狀

惠及荆公遺墨入手喟然想見風流餘韻招慶定林之

間無復斯人矣親老年來多苦足弱臂痛未能脫然然
眠食亦不惡承眷與不淺故及此弟姪輩皆荷齒記感

戢感戢

右見
石刻

與幾道書

某再拜道出貴部喜於承教伏蒙敦叙親親之義甚厚
違遠忽復改月何勝懷仰夏暑暄濁不審何如伏惟太
夫人寢膳萬福府中清明事簡不廢溫清甘旨之職退
而宴閒吉慶所會區區方抵高安幸無他方遠談席伏

祈為道自重以須陞擢謹勒手狀

右見家傳

與彥脩知府書五

某再拜春末被旨移戎州謂計日可參候故不復拜狀而多病就醫藥所至淹留凡三易舟乃得及此比來不審尊候何如曠旱得雨想少慰憂民之意某捐棄漂沒衰疾慵惰久在林麓已無衣冠但有幅巾直裰野人之服恐不可以造公門謹勒手狀承動靜

欽想風流有日邂逅獲奉緒餘少慰鄉往不肖放浪林

泉間已成寒灰槁木尚蒙長者過當愛護使立於無悔
之地敬佩嘉意無以為喻重辱手教存問勤懇感激感
激區區來日遂行無緣瞻望唯冀為國自壽以須陞用
流落羈縛邂逅明公為邦辱知辱愛謙重深畏似淡
薄而久長有以見君子之交味也奉別忽踰半年雖修
問不數懷仰則勤即日黔州氣候想尚溫煥不審尊候
何如伏惟安靜不擾民以寧一神所扶祐日擁多福無
緣參承臨書馳情無量伏祈為國自重以須超擢謹勒

手狀

比因彭水人回上狀當已徹几下即日暑雨煩溽不審
尊候何如伏惟公平清重民以不擾神之聽之百福所
集某以家弟不聽遽別留涪陵忽月餘今日遂成行益
遠齋閣惟有馳情伏冀為民自壽以須陞用謹勒手狀
竊觀鎮靜足以安夷獠清節足以伏吏民郡齋燕閒時
與僚佐歌舞以謝江山當亦無不樂時別後未嘗不思
清對也由涪渝至此遂無酒可敵齋中色味此邦微有

瘴霧日湏醇酒幸此旁舍民家頗解醞酒相給耳殿直
想讀書益有功但令屏雜學且以筆墨弓矢為戲令村
蠢老兵為給使久之自當習靜成性矣小子相得一少
年淳謹者與同學稍能勤也

與崇寧平老書

某拜手昨淹留長沙每得雍容道室惟是賓客紛紛勞
費主人又罕得奉清談耳別來何日不懷想道遠難得
便風音記闕然如化主來辱書勤懇承已作崇寧主人

想見開堂盛集遠助忻慶耳寄茶佳惠此方或不與秦
塞通人煙石磴亦無但於白子中杵修仁茶煎飲耳所
惠春芽極嫩再見漢官儀也相見無期千萬珍重

與子仁帖

某頓首比承惠顧敬佩厚意暄暎伏想侍奉吉慶承貴
字曰厚卿竊不以為然安太尉名字如此已顯又是當
朝貴人不可全用也季札見舞韶樂者曰如天之無不
燾也如地之無不載也夫能大庇萬物者莫盛於仁可

字曰子仁則免學人又無俗氣也不知可否

與公蘊知縣書二

某叩頭不審高安風物何如平生嘗游宦在江西否同僚可與共溪山之樂乎春氣暄暎即日不審何如伏惟萬福王事不至勞動否舅母縣君勝裕某孤露困窮日在墓次幸無他女睦兒相並附起居禮

某於公家至不踈度相與之意亦不淺被旨至陳留略已六十日終不能作一書承動靜亦知公初領邑事不

能不少勞神於簿領書問之闕自可同體相盡爾沈簿
吳掾往來問起居之詳每承流問恩意備矣某以繆於
史事遠竄黔中罪大恩寬惟有感涕即日俟受命即行
無緣會面臨書懷仰千萬為民自重謹奉狀

與味道明府書二

某頓首向承與舍弟書意欲得巫山縣字老懶久之不
能下筆今日偶快遂書得然物材皆不如人意且謾往
不知堪用否往嘗授大字法於許覺之用退光木板面

以胡粉書不可意輒澣去然既可改則意態有餘往往下筆即可耳然巫山榜以回祿墮敗今此字癡拙有老人態則是水土重遲之筆多似可厭勝耳

深源久不聞音問安否此邦士大夫亦多善士思欲得如公高才廓落者一晤語不可得也思古人看羊海上十九年可謂弘度君子矣令弟得近書否小子過蒙齒錄甚不忘往日周旋教載之惠也

與子正使君書

某再拜奉別再見秋暑懷仰何日不勤夏中兩上狀不
審皆得徹几下否不雨四十餘日歲事或失望時雨三
日甚慰人意想貴部亦霑足秋成有望憂民者可以加
餐矣蕭彥和解官去新通判為誰相歡否某寓居蒙免
未緣瞻望臨書馳情伏祈為國自重

與元仲使君書

某頓首再拜元仲使君大夫閣下間者往來道出治部
過蒙地主之禮勤重千萬別來懷想何日不勤頃至武

昌即留居完葺民屋久之乃小完以是欲修記不暇即日春寒不審尊候何如伏惟宴息暇豫千里按堵寢食之味神所相勞某以避范德孺法當遷居輒欲就貴部自謀一舍不敢煩公家但不知有責降宮觀人在貴州否某已具人船聽誨諭乃發耳此行似有親依之便望路欣欣謹勒手狀承動靜

與宋仙民書

某辱教審侍奉萬福為慰竹萌佳惠謹以奉旨甘以成

公之德施缺然不得面懷想良勤真老萬福

與六祖範老書二

某頓首以衰朽怯人事不能一到成都甚負佳處登覽
然亦是老年漸不喜此曹狡獪耳乃煩輟為人天談道
之光陰翻然一來掃地焚香奉侍數日不知不為世緣
所奪否元監院相隨許時經藏記亦未就但亂寫得十
數軸字歸耳其人曉事幹辦他日若得渠相輔佐甚善
廣之景年及房君所須字各寫得一兩軸并書囊在戎

州不及攜來須到家乃可遣餘事元能道之又相見有期不復覩縷

某啟前因三學山化主廻奉手狀并漫記一扇不審得徹禪几否頃人自富義來再奉手誨喜承宴居多福比密師自富義來報成都虛六祖奉待又壽寧僧宗喬自成都來云公已受六祖疏計不虛傳輒作短疏助佛事然老嬾不成言語也某寓居處漸完葺內外終不會省費然厚薄亦隨緣知命欲到成都看藥市此行一費亦

不小亦無處減省耳前所寄諸書甚助荒廢欲隨事未
記數句尚未暇惟悅老語錄常在几案間一日緣會便
下筆矣別作一篇竹軒頌似可觀已付密師去可種竹
於六祖即用之或須別寫即寄本來可也所要文字多
寫在密師處不知化緣道路悉存得否秋熟嬾倦奉狀

不如禮

右皆
家傳

山谷別集卷十四

欽定四庫全書薈要卷一萬五千一百六十六

集部

山谷別集卷十五

宋 黃庭堅 撰

書簡

與王立之承奉帖六

與逢興文判官帖五

與宋子茂書六

與知郡朝散書二

與趙伯充帖四

與王瀘州書十七

與王子飛兄弟書五

與甥王霖書

答石信道書

與郭英發帖三

答蘇大通書

書簡

與王立之承奉帖六

某頓首辱教惠蠟梅并得佳句甚慰懷仰數日天氣驟暖固疑木根有春意動者遂為詩人所覺極歎足下韻

勝也比來自覺才盡吟詩亦不成句無以報佳貺但覺
後生可畏爾

某缺然不得面甚瞻遲春暄喜承侍奉萬福送花荷勤
懇然今年來意緒凋落懷此泉下兩玉人不再作無復
斯賞矣數日來幸老兒所苦減七八差有生意耳

昨日聞立之輒有雍丘之行以奉甘旨又以暇日篤學
問竊以為甚慶然以親老至今未下榻自局中還則問
膳飲湯藥未嘗得分寸餘陰以故不能奉記辱手教審

侍奉萬福為慰詩賦論題似不須從人求之但取慶歷
萬題檢取似某題而體制弘大者即可以試筆每舉場
所試未有不出於此也

昨日到家即問老親藥餌初不知車馬見辱也繼得手
誨審侍奉萬福為慰書藁筆意駸駸頗驚老眼更以書
史實之古人豈難到耶菊苗得奉甘旨拜賜良厚對容
奉答草草

辱教審侍奉熙慶為慰雨氣差涼頗得近文字但苦為

俗事所奪耳寄寂齋賦語間秀氣鬱然大為佳作欽歎歎然作賦要須以宋玉賈誼相如子雲為師略依放其步驟乃有古風老杜詠吳生畫云畫手看前輩吳生遠擅場蓋古人於能事不獨求誇時輩要須於前輩中擅場爾

比以親老時時小不快又身亦多病故百事廢弛思欲胥踈江湖之上耳如所諭云云皆非鄙人所任責者但審侍奉萬福為慰所問應舉事恐不必爾士大夫平居事父兄之餘力固以讀書學文不免為親應舉得失便

有數科寧有利不利耶思義理則欲精知古今則欲博
學文則觀古人之規摹孔子曰觚不觚觚哉觚哉盛暑
嬾出入不欲公冒熱往來但懷思爾

與逢興文判官帖五

某頓首某放逐棄捐人不脩數頃聞君子來佐幕中之
畫欲寓一書承動靜亦以所處蓬蒿岑蔚不能自致忽
奉牋教之辱非所敢當竊審舟御在邇遂有參承之幸
何慰如之方聽挈音伏謁水次謹奉狀起居

某隱約林泉之下人事幾絕每作牋啟輒當煩公家借書吏比來更欲省煩遂不能作牋報人竊惟公狀之禮文貌盛而忠信薄故輒闕之謹以手狀承問伏惟痛察某廢棄明時乃蒙加以賤教見待以故時士大夫之意已成田舍老翁豈敢當此禮數過當過當即日溽暑不審尊候何如伏惟起居萬福軒蓋何時入城想瞻馬首謹勒手狀

某閒居無佐書吏不能作牋亦欲縮手省事不復借之

公家又惟公銜之禮文貌盛而忠實闕焉輒廢此禮惟君子能盡人之情當不復以小謹見望

黔江密邇施州聞其民稍喜為田訟然牛刀之餘刃投之雞肋何足治哉顧閒居少得遊從耳南老不臧否人物吉德之君子也時相與談民間稼穡事亦足樂也比江南寄新茶來味殊佳恨未得同一烹欲寄牙子去恐邑中無善磴不久磴成求便寄上矣

與宋子茂書六

某頓首鄭斂直頗能道在官曲折知官况亦不惡也事
業宜深自修蘊而處同僚中須親睦勿露圭角也仕路
風波三折肱乃知為良醫耳或因公家幹委能至此相
見否有一事奉煩為審問聞前權江安尉屈伸有女弟
欲擇一士人歸之此有一來從學舉子玉山劉瑜字倩
玉年二十頗卓立以鄉里難得婚對初道屈氏婚乃以
為恐為門下之羞老夫勸之曰士大夫立身非一帆婚
屈氏何害渠家尊長乃來見懇若屈家猶在瀘南試與

子細問當示一報便可致禮幣往矣劉君決可依者也
頃辱書審在公夙夜體力輕安為慰虞候周章及峨眉僧曉賢去繼奉書皆徹几案否某寓舍已漸完使令者但擇三四人差謹廉者耳既不出謁所與游者亦不多山花野草微風動搖以此終日衣食所資隨緣厚薄更不勞治也此方米麪既勝黔中飽飯摩腹婆娑以卒歲耳閒居亦絕不作文字有樂府長短句數篇後信寫寄未緣會集千萬勤官自壽偷餘日近詩書

戎州通判戴景憲奉議其人清慎和粹年雖尚少有老成之氣久與之游可愛也聞安撫司勾當成急闕亦聞王帥存心之美待官屬禮意周旋甚欲佐其下風計主人聞此君之義亦樂之但恐先有求囑者已諾之耳不欲數作王帥書請因事為達此意

比因還部兵奉書當已徹凡下盛暑小雨比來日用佳否子飛子均子予想數相見否每相聚輒讀數葉前漢書甚佳人胷中久不用古今澆灌之則俗塵生其間照

鏡覺面目可憎對人亦語言無味也不肖累日來意思

極不佳初疑其欲作大病熟思之乃是卧簟達旦夜中
不加寢衣耳既而徹簟敷席小忍煩而加衣遂無恙恐
鮮君到說累日病故具之鮮君閨中修謹讀書知意味
者也以故人書到此見其宗人其宗潤屋也治楊朱之
術故一毛不可拔以此困於逆旅諭三四平日與游者
乃能上道意望瀘人稍能薄濟之如何百冗草草

比承小疾遂久之不除雖調護之不至亦是奇耦氣數

中小小鬱滯耳秋氣在中旬計得此即安快主人驟去
職出於意表想不能不耿耿公之在幕府所以為知己

者異於凡流想胷中亦未易平然可置是事為善謀行
李令得理所度不必倉皇去瀘州略令舟楫整備乃下
江津治荆南之行為佳耳渠諸郎多賢必能從容治行
李不令老人動念也自此時當奉書密上坐本到瀘止
為範公營齋糧度今亦難然業已成行亦不久留耳脾
無令病慎養氣慎作病之食少飲酒以身為本勿以小

事汨其中安樂法也餘復何道

兩辱手誨承病起及今乃安和矣能以覆轍兢慎如此
即是萬全安樂人矣人生以身為本其餘於我何有自
今可研物理求道術否王帥之去民有甘棠之思而門
下士失嘉木之蔭想亦耿耿不易平也或聞有理之者
冀或便得一闕耳未緣會集千萬珍重

與知郡朝散書二

啟霜寒日嚴伏承尊候康和慰喜無量奉賜教曲折憐

問感服至深家信上煩頤音愧不可言某官局勉以不
瘳幸親老在都下善眠食兄弟無他以為慰惟是欽仰
齋閣無緣承請耳蒙誨諭意思不佳三界無安愛為根
本惟洗心於道者不受纏縛不審頗觀佛書否若於此
有味即能化煩惱境界超然安樂尚阻親近輒以食芹
之美獻諸左右率易恐悚謹上狀

前日遣急足等還上狀當已通徹冰霜沍寒萬物凋瘁
惟君子坐進此道因時制宜和氣如春鰥寡蒙福伏惟

起居甚休氣力安樂縣君勝健諸少皆佳某與典司管
鑰不敢怠遑提舉司復來問差遣今有一皮角并衛都
曹別紙呈上告指揮丁寧遣遞幸甚俸錢歷及申狀亦
煩左右復欲割俸二千往鄧州已託二推作保狀但得
蚤批鑿續作一家書附鄧州公文入遞也瑣碎事事溷
瀆高明愧恐不可言特特親親眷憐遂不敢自踈耳官
守簡書是承無緣參候不勝馳情謹狀通起居禮

右皆
家傳

與趙伯充帖四

某再拜累日有少文字事極冗欲通記輒復不能辦前
攜八篇到館中宿夜諷玩頗見才思有婆娑水邊林下
之氣欽歎不已欲裁定其中三兩處用字小弱處尚未
能下筆更少寬三二日同長史帖遣上此帖珍絕殆不
能去手也今日偶在家治堂西作一小書閣筆研方塵
坐上啟極草草

某雖官局間冷亦匆匆度日不獲時通問昨日到寺齋
見留墨想見風度高爽也風霾殊不佳伏惟道齋清虛

圖史左右不以聲妓參濁其間致有樂處解嘲詩遣上
不足觀也所評山水大似歷良為賤嘗愛其木枝老硬
皴石尤能作他人所難恐翟院深不能也且為標出當
使飽觀俗筆者少改觀耳呵呵前篇已示晁無咎陳無
已皆欽愛之無可措筆矣

天氣尚小寒不審奉承几筵尚能支持否和公行狀勉
強就此不知可用否日月川流奄將祥練伏惟觀此論
次痛割何可勝言謹奉疏

伏蒙手疏勤懇相與可洞照表裏不必為爾先公言行
冠映宗室僅能撰次無以發揮潛德推與之意多道其
實愧悚愧悚兩日集英祗候退食疲乏上啟草草

和國
公行

狀載第

七卷

與王瀘州書十七

某再拜啟春氣暄暎不審尊候何如伏惟文經武略燕
及夷夏樽俎折衝百福所會頃蒙寓遞賜書勤懇千萬
匆匆未果馳狀巡教使臣到城復拜教墨仰荷眷憐之

無已審聞左右動靜良慰懷仰某棄捐漂沒不當行李
無緣瞻望旌麾伏祈為國自重謹勒手狀附承起居謹
狀

先公潛德之光雖未顯於中朝而清湘之民傳世奉祠
此非人力所能致也託於不肖之文曾不足以發揮萬
一過蒙稱謝愧不可言謹奉來諭改定數字大書并作
碑額衰憊勉為之殊不足觀不知堪入石否更冀裁酌
程三班回奉狀當已徹聽下即旦夏氣煩鬱不審貴

州風土寒燠何如伏惟投壺雅歌蠻夏安業卧閣宴閒
百福所集某潛伏藜藿之間亦粗能經理衣食之資舍
弟遠挈小子并渠一子一妾來相與處亦慰眼前餘無
足道者匏繫窮山無階承教惟有馳情謹附承動靜謹
勒手狀

楊三班來問得左右動靜甚詳承宴處深密虜在目中
無不安帖良慰懷仰聞瀘南山川清秀頗得寮佐相與
登臨宴樂之否無緣相從一笑願時覽經方盡衛生之

理以須陞用

奉披手誨勤懇千萬伏承尊俎折衝夷夏安樂詔命優
渥拜真二千石未即召還以慰遠民願借使君之情伏
想制書已下公私相慶無緣言面遠同驩慰耳即日霜
寒不審尊候何如願加珍嗇以須不次之寵謹勒手狀
前蒙附郭殿直所賜書并得蠻弓弦作卧茵及餘甘
二種即作書附江安尉李儒道謝并致雙井去不審已
徹左右否郭殿直近方到此問得動靜甚悉以慰懷仰

即日春寒不審尊候何如伏惟卧閣宴安折衝千里之外夷夏無不待其職明神扶佑百福所會令嗣及解元想數得安問兩令郎尤淳謹喜讀書此亦長年可喜事也前守曹供備已解官去新守高羽左藏旦之弟也老練廉勤往亦久在場屋不易得也雖間居與郡中不相關亦託庇焉某比苦脚氣時作頭眩脛中痛雖不妨寢飯亦是老態漸出因自杜門不復與人間慶弔相接林下唯與二三道人共齋粥似差勝舍弟兒姪輩不窘衣

食便是了一生無足貽念無緣參承千萬為國自重謹
勒手狀

初夏霑雨寒燠無節不審貴州氣候何如伏惟美政在
人夷夏蒙福六物時序禾麥茂好齋閣清淨起居輕安
張侍禁來蒙賜書勤懇并問得張侍禁即日動靜曲折
甚慰懷仰無緣參候憑書增歎謹勒手狀

夏氣暄濁不審尊候何如伏想尊俎折衝蠻夏安業齋
閣豫暇亦有文史之樂扈縣時得安問先輩幾時可到

侍旁季子講學有日新之功近巡教張侍禁回上狀并
漫送施黔茶當已徹聽下某春來嗽苦筍多乃苦心痛
殊惡雖進極溫燥藥得無恙然遂不能多飲茗亦殊損
減人光彩王子敬所謂都不復得小失和亦不復得安
近生冷體氣頻至此令人絕歎者也舍弟知命將其雛
往視涪尉未還不肖既不復出門飢飽寢處頗得自遂
無緣瞻奉臨書增懷謹奉狀

某棄捐漂沒早衰多病杜門不與人事之日久矣不能

承動靜缺然累月引領旌旆何日不勤鄭疑直來蒙賜
教勤懇感慰無量黔中霜雪早寒伏想治所山川氣候
不甚相遠即日不審尊候何如竊惟投壺雅歌夷夏安
帖齋中時有宴會以謝江山飲食起居當更勝健西師
在行折衝之地方顧人材之不足度高材密畫豈能久
淹留於此某已成老農畦種摩圍之下粗給衣食無緣
瞻望臨書增情伏祈為國自愛以須詔用謹勒手狀
別來雖累月自以罪戾不復可湔被所過人視之唯恐

為渠作崇故雖平居親愛能忘其不肖者亦不敢以書
通如長者之庭則未嘗一鄉往也乃蒙九月十日賜教
存問勤懇感慰無量無緣瞻望臨書馳情千萬伏祈為
國自重以須進用

不聞嗣音忽逾月區區唯有懷仰即日天氣亦小寒不
審尊候何如伏惟慈惠浹於民上下愛敬府中無訟齋
閣但文史歌舞之樂家庭詩禮雍雍肅肅神之聽之百
福所會其衰疾不損杜門似有味萬事隨緣亦忘衣食

之豐約小兒輩稍知讀書有兩道人於此同齋粥耳有鄉人鄒好先者以鬼谷五命游兩川舊矣云有緣事至治下故輒附手狀承動靜

表弟盛推官來蒙賜教勤懇敬佩玉音無有厭斁審即日百福之會神明所相寢食具宜良慰瞻仰傳聞進官再任之命已下伏惟驩慶不唯夷夏之民安樂中和之政歌舞於下小人亦得以聲影相依實自慰也小人於此一畝之舍松竹深茂得以自藏死生之故付之造物

更無他緣顧無階朝夕承教為恨耳瞻望數舍臨書日增
情伏祈為國自重謹附承動靜

奉三月朔教存問勤懇忽病臂痛月餘未能上報家弟
來歸又奉四月十三日所賜書荷眷憐之意無已自顧
衰疾無所堪任何以承此嘉德惟高明豈弟能厚往而
不冀其來軌量固如此耳雖無前人風鑒之萬一未嘗
不深歎伏也夏氣蘊濁即日不審尊候何如伏祈為國
自珍以須不次之旨謹狀

秋暑方作旱災焚煖甚可畏不審比來寢膳何似蘭亭
詩偶寫得但揮汗臨紙研殊不能工耳盛推不幸至於
此其家倚盛德之蔭如震風凌雨之得廣廈也然調護
之功未畢迫公治行不識諸幼皆得理所否人生危脆
如此以此觀不安分而多岐治生求與造物者爭功豈
不大惑耶施黔作研膏茶亦可飲謾往數種幸一碾試
垂諭如何江安尉李儒觸事機警若以道御之可令辦
事伏望照察

家園新芽似勝常年輒往四種皆可飲但不知有佳石
磴否石磴須洗令無他茶氣風日極乾之牙子以踈布
淨揉去白毛乃入磴少下而急轉如旋風落雪方得所
大率建溪令湯熟雙井宜嫩也

秋暑即日不審尊候何如伏惟以義自將夷險一致飲
食起居有神相之承忽被旨罷瀘州所處僻左未知其
詳審爾計即東去此在庸庸之情戚嗟若不可終日頃
竊觀氣質仁厚神宇深靜事君之大節可與冰雪爭明

北叟之所以觀倚伏惟明公胸中落落故不復為憂之
耳惟是無階叅侍不勝馳情謹承動靜謹狀

承欲漸解舟至王市治行盛暑良不易聞撫句廳亦可
少駐使節若俟治舟略有倫序放船就江津以待江水
似佳聞老兄橐中亦不豐然隨緣以為日用豈有闕耶
子姪皆賢想處之裕如也聞命之初賢愚無不動心以
為老兄何以處之獨不肖以為不然夫物之成壞相尋
如歲之寒暑有人喜寒而惡暑世必以為狂疾人至於

樂成而憂壞則謂之有智不可乎老兄鑒此必有餘不能忘情故及之耳

與王子飛兄弟書五

某頓首相與既同草木臭味又有瓜葛故不復作牋老來枝葉皮膚枯朽剝落惟有心如鐵石益厭末俗文密而意踈他日惠書願悉去表襮但作家書數行幸甚舍弟極道辱公家眷卹不倦之意嘉州文字若干計乘舟不日過此冀得少欵清論臂痛方小愈不能多書能照

察否

子子即日想侍奉多慶郡齋虛閒當能屏去煩濁之緣
求書史清靜之樂也姚君所攜紙卷已下筆未了不久
同蘭亭詩及子飛紙軸附密上座行矣密上座自富義
回已三日更三四日決定東流矣見子茂為致意千萬
藏府豈可使久如此不可以常理待之比得一法用榮
州珠子黃四兩辰砂一兩研如麩乾炊餅末五兩滴井
花水為丸如桐子大每服三十九稍加至五十大病盡

一劑唯忌生肉血物及生菜勿食極熱物極熱物能驅
逐藥力隨大府出則十不得四五力耳通手瓶漫因便
船附四隻有佳醋羨餘可附船為惠旋得一兩器可爾
伏奉手誨喜承侍奉吉慶惠醋極副所須感刻感刻
鮮自源本不敢重煩左右乃亦辱哀王孫之意愧悚愧
悚聞比來得將護氣體遂完壯不廢觀書何慰如之承
換差遣不得不能無耿耿陰陽家謂克己者為官既已
從仕則受制於官不得悉如意也然人生而游斯世逆

順之境常相半強壯時少歷阻艱亦一佳事耳無緣瞻望唯冀為親自重慰此懷想

善人宜極眉壽况於名教尤所勸勉士大夫知與不知誰不嗟惜伏想子飛兄弟天地之性甚篤當此屠割之苦何可堪任日月如積追慕則新奈何奈何某屬以病目多日意緒無聊欲勉作小文以侑奠酌久之牽強乃成是以往獨後衆人惟其忠實之情則在衆人之前仰恃哀察居喪以哀為主而濟之以忠厚則無悔摧毀太

甚亦不可以獨為君子千萬以禮制情

前孫君回承惠書勤懇衰疾無堪何以辱此禮意送叔
敬人忽去不來取答因循至今未嘗忘懷也姚君來聞
侍奉萬福子飛遂輕安諸伯仲日同文字之樂何慰如
之前所須三四日間送姚君人回別遣書且寄亂寫數
紙數日來臂痛似欲不能堪不能復作楷奉書極草草
想相處之宜不在能為苛察小謹也春和日永惟希勤

書以悅親心

右皆得
之其家

與甥王霖書

某頓首禍變無常賢叔安撫使君奄棄盛時聞間驚惶不能處情伏惟少孤流落來依猶父之德當此大變哀痛何勝奈何奈何惟表姊太君雖嫂叔之別禮所遠嫌而賢叔孝友之義兼倍常人想哀戚亦不可言日月不居逝者益遠永懷敦睦何時可忘千萬以前人之意照顧子飛兄弟衣衾饋粥

答石信道書

某頓首忽承賜教累紙勤懇審邑庭虛閒時與僚佐共
尊酒之樂何慰如之惠蝦脩甚珍小獠無不垂涎也屢
蒙一元大武之貺而香其翰音之獻不登長者之堂良

以為愧頃聞江次大風頗為災幸而比雨足象成豐矣
吾輩可以摩挲經笥飽湯餅也代者今在何所稍涼到
城中亦佳耳所諭嬾書前言戲耳人生勤嬾各隨積習
而成性嬾亦好勤亦好此司馬德操法也尚阻瞻對惟

日為歲伏冀善眠食自重

右皆
家傳

與郭英發帖三

某頓首薦辱惠詩句益清壯竊深歎仰使老者增愧耳
陰曠秋色未佳思一步到北禪可同幽徑閒談但恐雨
作耳或得往當道次奉招也

昨日辱手畢留來使取答會彭守報過遂不得遣經昔
伏想日用輕安所作樂府詞藻殊勝但此物須兼緣情
綺靡體物瀏亮乃能感動人耳輒擬作三篇不知可用
否又奉為寫得文字兩軸須行日作送路也

筇竹贊頌文陋筆弱皆不足傳乃煩刊石但增愧耳東坡公聽琵琶一曲奇甚試用澄心紙寫去因詩句豪壯頗增筆勢或有嘉石試刊之齋中亦一奇事也

答蘇大通書

頓首辱書勤懇千萬觀所自道從學就仕而知病之所
在竊窺公學問之意甚美顧既在官則難得師友又少
讀書之光陰然人生竟何時得自在飽閒散耶三人行
必得我師此居一州一縣求師法也讀書光陰亦可取


諸案牘間耳凡讀書法要以經術為主經術深邃則觀
史易知人之賢不肖遇事得失易以明矣又讀書先務
精而不務博有餘力乃能縱橫爾公家二父學術跨天
下公當得之多輒復貢此此運水以遺河伯者耶蓋竊
觀公所論極入理人才難得故相望後凋於霜雪之後
耳臨行忽忽奉書極不如禮千萬珍重

右皆
家傳

山谷別集卷十五

謹案卷十五第四頁前六行軒蓋何時入城刊本
入訛父據別本改





總校官庶吉士臣張能照

校對官中書臣張九譚

謄錄舉人臣胡念祖

欽定四庫全書薈要

集部

山谷別集卷十七

六

詳校官助教臣謝登雋



欽定四庫全書薈要卷一萬五千一百六十七

集部

山谷別集卷十六

宋 黃庭堅 撰

書簡

答人求學書

答陳季常書二

答何斯舉書四

與東川提舉書四

與戎州新太守書三

與楊齋郎書二

答史子山書

與周元翁別紙



答秦少章帖六

與朱聖弼書

書簡

答人求學書

某頓首乙酉辱留書及詩道別勤勤懇懇方欲作報丙戌重承長牋敘致從來禮意過當實犬馬齒長聞道婉婉琢磨少功足下愛而忘其醜使當拜起內顧非所可承特以叔遂事契故不敢終辭如書詞所推與皆畫脂鏤冰隨世磨滅耳何足重陳經世之術足下已知朱公

之說壁與逆旅之貴惡妾安往而不自得哉古人言瘖
聾之徒真世之有道者方欲從事於此同與足下勉之
古之人學問高明胸中如日月然後能似土木與世浮
沈無死地以受衆人之彈射恐足下猶怏怏前語故詳
道之過此以往口掛壁耳荷字詩奉報如此以當面豐
城舊詩漫錄去攜至君邑有臭味同者示之壽禪師伽
陀輒妄意公可得力者數篇往願置左右有透脫處書
來示喻瓦薰鼎本來制作頗工令陶家盡用舊規但以

沙合齊為之不用成沫為妙張豐城書併煩從者幾時
成行侍奉太夫人昆弟俱否願慎行李以慰馳情右家傳

答陳季常書二

伏奉六月二十八日手誨審春夏來舍中須醫藥今已
安平為慰承鬚鬢遂欲如雪此世間公道也山居岑蔚
粗有林泉兄弟相與致力墓次耳過蒙推獎愧悚愧悚
天覺欲弭節山中故人會合誠可樂不肖哀毀之餘已
成一翁九月當從吉且當丐一宮觀養病數年无緣追

陪勝日良以悵然鄭希道篆學深博今時士大夫不能
及者前奉問希道今居何許年幾許今為何官不蒙報
何也雙井前所送乃家園第一如公所論不可解竊意
似南方士人觀國耳昔有南方一士初入都見縣巷燕
支鋪羣婢即歎息以為燕趙之絕色及其遊界南北真
見妖麗之姝遂復尋常耳豈曩時所見長鷹爪者初至
縣巷口者乎今謾寄數兩大爪然其味乃不甚良也
惠嘉句假借踰分祇增愧耳不作詩已五年試索胸中

不復能一句矣無以報嘉媿恐媿恐聞安期丈年七十
七耳目聰明白首一節欽歎柳七從來謹約知柳四洗
脚上船亦為克家之子乃老人晚福也景雲復古塔大
為盛事前外甥洪炎亦嘗錄本來乞記已諾之矣但夏
秋來多病文思枯涸更少待所諭濡潤某自在太和即
不受人物如季常乃不知耶小子相已十歲頗頑壯稍
知讀書辱問及甚惠高麗紙卷遂為人所取不可得深
秋涼時別寫數紙雜詩去公擇詩既不果作豈可作贗

以誣泉下人耶公但勉終令德勿以時和歲豐飽煖充
足退處士之節他日為公作一佳墓碑此不朽之事也
何以詩為哉公擇莘老宰上之松已拱令人慨然人生
健時不可不勉為善耳安期丈不敢作書往煩老者報
答因几杖至田間為承動靜

答何斯舉書四

別來不復能通書孤苦憔悴之狀不言可喻中間每見
邠老龜父兄弟詩卷中有佳句未嘗不咏嘆也辱書累

紙恩意勤懇但增感塞參前堂佳句甚高秀欽歎欽歎
參前堂但前對溪山脩竹古木森然頗助觀已其後夏
月皆綠陰不見日耳土木之功則極草草又堂中之人
哀悴廢學甚不稱佳句也未緣晤集千萬強學自重

外甥鴻父得託貴門相與遂有瓜葛良以為慰諸令弟
想講學不倦哀悴昏塞不記貴字欲奉字曰斯舉不知
可用否取論語所謂色斯舉矣者但恐或犯諱字耳因
來示諭陳季常所刻蘇尚書詩集煩為以厚紙印一本

見寄只封在鴻父處亦可爾

寄惠蘇公詩集亦自有用處要欲得一本厚紙者藏之名山耳季常所寄亦是此一種紙當料理季常為用厚紙印耳斯舉者觀所謂色斯舉矣翔而後集已極古人去就之意無可措言欲作序者但為之華藻耳哀悴以來文思枯涸幾如井谷射鮒俟寒泉稍集即當下筆

春來寒燠未節承侍奉萬福為慰令弟進學無恙承示諭親友離羣有獨學之憂苟無其人當論其世友古人

於黃卷之間耳宗伯蘇端明之詩筆語妙天下於今為
獨步當激賞其妙處率馬以驥也觀斯舉詩句多自得
之他日七八少年皆當壓倒老夫但須得忠信孝友深
根固蒂則枝葉有光輝矣

右皆已載何琮
所集蘇黃遺編

與東川提舉書四

某再拜竊惟道塗風霜使節衝冒良亦勤止即日不審
按部所至尊候何似澄清之氣凜然光被於江山願篤
行李以慰夷夏瞻仰小寒伏祈為國自重區區誠禱謹

附承動靜

某壅蔽樸愚未嘗得望履幕下重以負罪竄逐強顏未死捐棄漂沒不當行李無階修敬昨以親嫌遷置戎棘遂得潛伏蓬華為貴部之民區區常慮謫籍之塵垢點污大旆之光輝以是久之不敢通名於左右恭惟君子能盡人之情知其心危慮深終不以為簡也

某閒居杜門蓬藿拄宇鼯鼯同逕寒灰槁木不省世事故非至親至舊可以通書而又不以罪譴點染為嫌者

未嘗敢修牋記以是待罪部下累月不能作狀一道哀疾之迹萬里投荒一身弔影其情可察頭眩目昏書札不如禮伏惟高明仁慈尚能寬之

某名在不赦之籍長為明時棄物胥䟽隱約蓬蒿之下直偷生耳已無冠帶可從人間禮數但有幅巾直裰僅自蓋纏不可以叅謁使車之道左請問舍人記室惟想望英風凜然聳平生願見之意耳竊惟盛德之度可以存而不論言語複重益老病之常態冒瀆清重悚仄無

地

與戎州新太守書三

某再拜啓當此風霜大施衝冒良亦勤止恭惟弭節江
次起居萬福此邦之民已歌來暮願篤行李以慰瞻仰
時寒暴露伏祈為國自重區區誠禱

某負罪未死捐棄漂沒不當行李未嘗得望光彩昨以
親嫌遷置貴部遂得潛伏蓬蓽為樂國之民竊以自幸
區區常慮譴謫之塵垢點污大旆之光華以是久之不

敢通書於記室恭惟君子盡人之情知其操心危慮患
深終不以為簡也

閒居杜門不甚預聞人事不欲煩公家借書史故非至
親至舊可以致手書不以謫籍點污為嫌者未嘗敢通
音問也以是密邇舊治不能作記以道衰疾之迹蓬蒿
塞門貧病在躬直可棄捐何足為長者道之勉强修敬
頭眩目昏書札不如禮惟高明尚能貸之

與楊齋郎書二

某頓首辱書勤懇喜承盛暑侍奉萬福某捐棄漂沒不
當行李得罪明時無可解說而足下相與如平生數千
里之間精神感會勤勤懇懇如慕古人亦足以觀足下
之不隨流俗故不待相識而相知也然當此盛暑未宜
衝冒貽老者思念耳未即瞻對懷仰則勤尚冀珍重謹
奉狀

伏承尊公豈弟之政在民民安樂之又得借寇恂之願
想見樂國風物之美恨不得身出其間耳欲作尊公書

適病起疲倦作二書已不能堪幸因問膳道嚮往之意
答史子山書

某頓首辱書勤懇審侍奉萬福為慰寄惠石刻感戢恨
摹勒者非其人不稱顯親傳後之意亦是鄙文不足以
行遠故感果如是耳遠致張雅墨絲鞋煮酒公自食貧
何煩如此祇增愧耳唐坦之館穀數月刲春鉏之股以
啗於菟豈能久堪耶鮮自源煩調護西歸良不易微公
索之枯魚之肆矣然斯事亦難責辦於在官者惟公尚

可耳盛暑不雨比來體力何如講授不至疲勞耶未期
良集惟希珍重

與周元翁別紙

往在雙井所見黃龍心老蓋莊子所說伯昏瞀人之流
但年已七十四五不復肯出矣有清新二禪師是心之
門人道眼明徹自淮以北未見此人今所與共居師範
上座是簡州瀉山喆老門人也其人聞道已久多見前
輩道機純熟智慮深遠於士大夫中求之未易得恨公

未見此人耳若漫學言句穿得佛祖如貫珠終何益哉
思公窮悴而守道不渝此益古人所難也然已知求道
於生死之際則世界自己甚輕但未直下撥塵見已耳
所寄絹軸謾書此數種語試觀之何如所云矢注目而
不瞬若視去如來不當言動不動法皆是磨滅敗壞之
相故長者云若不見法身本體所以萬行皆屬人天果
報有漏之因既盡心於此不可不著些精神打令徹底
不疑念念但觀不舍晝夜豈更有一塵佛法可建立也

答秦少章帖六

某頓首前辱惠教并示新文累紙又屢屈車馬公私匆
匆不辨眼前盛意未報然欽愛之誠則勤足下當諒此
天氣日夜涼漸宜燈火想於文字益有功凡可以養生
事親者用心焉事無道俗一以貫之獨願勿載得失於
心術耳午後稍暇當約過鬴池閒談

作文字不必多每作一篇要商確精盡檢閱不厭勤耳
舉場中下筆遲澀益是平時讀書不貫穿也併書十扇

甚愧勤國士也筆意殊有佳處公舊學蘇餘杭書已有
功政坐變從不肖規摹筆乃小嫩耳

前承惠詩并得教極荷相與不怠詩輒和呈所問文體
大似擊鐘叩其旋蟲與筍簾不若發其全體之聲耳欲
得陳無已舊作黃樓賦記及答李端叔書如有本且借
示

學問之本以自見其性為難誠見其性坐則伏於几立
則垂於紳飲則列於樽彝食則形於籩豆升車則鸞和

與之言奏樂則鐘鼓為之說故見己者無適而不當至
於世俗之事隨人有工拙者君子雖欲盡心夫有所不
暇相見乃盡之

辱簡記承學問不怠為慰前得所惠書展讀頗有家法
此事要須從治心養性中來濟以學古之功三月聚糧
可至千里如足下才性之美何患不及古人但勿欲速
成耳前承陳無已語有人問老杜詩如何是巧處但答
之直須有孔竅始得因相見試道之

比在告熟讀前所惠詩卷如公闢祭文語氣甚善詩句極有風裁可喜合處便似吾少游語然恨工在遣辭病在骨氣耳古之聞道者請問治天下則對曰去汝鄙人也何問之不豫也文章雖末學要須茂其根本深其淵源以身為度以聲為律不加開鑿之功而自閱深矣公誠以此言為可則猶有一物為公道之二十年来學士大夫有功於翰墨者為不少求其卓然名家者則未多蓋嘗深求其故病在欲速成耳夫四時之運天德也不

能即春而為冬斷可識矣承自屈訪逮故及此更占大方之家有所聞見幸見教

與朱聖弼書

某頓首公從事於仕上下之交皆得其懽心又勤於公家可以無憾惟少讀書耳能逐日輟一兩時讀漢書一卷積一歲之力所得多矣遇事繁暫闕明日輒續則意味自相接空時亦不須貪多要有倫序耳

右皆家傳

山谷別集卷十六